

**Utoqqalinermi soraarnerussutisiat akileraarutaasarunnaarnissaannut periarfissat
pillugit Naalakkersuisut nalunaarusioqqullugit peqquneqarnissaannik inatsisartut
aalajangiiffigisassaatut siunnersuut
*Inatsisartuni ilaasortaq Aqqalu C. Jerimiassen, Atassut***

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Mariia Simonsen, Inuit Ataqatigiit
Inatsisartunut ilaasortaq Kuno Fencker, Siumut
Inatsisartunut ilaasortaq Karl Tobiassen, Siumut
Inatsisartunut ilaasortaq Jens Napaattooq, Naleraq

UKA 2023-mi ulloq 28. september 2023 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Utoqqalinermi soraarnerussutisiat akileraarutaasarunnaarnissaannut periarfissat pillugit nassuiaasiornissamut Naalakkersuisut peqquneqarnissaat siunnersuuteqartup matuminnga siunnersuuteqarnermigut kissaatigaa. Taamatut akileraartarunnaarnerup qanoq aningaasalersorneqarnissaata misissuinermut ilanngunneqarnissaa siunnersuuteqartumit naapertuussorineqarpoq.

2. Siunnersuutip Inatsisartunit siullermeererneqarnera

Siunnersuut siullermeerinninnermi tapserneqarluarpoq. Siunnersuutip piviusunngortinneqarnerata nunatta karsianut kommuninullu aningaasaqarnikkut qanoq kinguneqarnissaanik apeqput siullermeerinninnermi saqqummiunneqarpoq. Tamannalu tunngavigalugu siunnersuut Aningaasaqarnermut Akileraartarnermullu Ataatsimiititaliamut innersuunneqarpoq.

Naalakkersuisut siullermeerinninnermi allannguutissatut siunnersummik imaattumik saqqumiussipput:

Naalakkersuisut kingusinnerpaamik ulloq 1. juli 2024 agguanneqartussamik utoqqalinermi soraarnerussutisiat akileraarusigaajunnaarnerannut periarfissaq pillugu nassuaasiornisaannut Inatsisartunut aalajangiiffigisassatut siunnersuut. Nassuaammi suliniutip innuttaasunut pisortanullu aningaasaqarnikkut allaffissornikkullu kinguneqaatissaannik imaqassaaq.

3. Ataatsimiititaliap siunnersummik suliarinninnera

Naalakkersuisut allannguutissatut siunnersuutaat siullermeerinninnermi nalinginnaasumik tapserneqartoq ataatsimiititaliamit maluginiarneqarpoq. Utoqqalinermi soraarnerussutisiat akileraarutaasarunnaarnissaasa aningaasaqarnikkut allaffissornikkullu kingunerisassaasa Naalakkersuisunit paasinarsisinneqalersaernerat ataatsimiititaliamit pitsaasutut isigineqarpoq. Innuttaasunut taamatullu pisortanut aningaasaqarnikkut allaffissornikkullu kingunerisassat nassuaammi ilanngunneqarnissaat pillugu Naalakkersuisut allannguutissatut siunnersummik saqqummiussinerat ataatsimiititaliamit pitsaasutut isigineqarpoq. Pissutsit nunatsinni utoqqaat atugaat pitsanngortinneqartariaqartut ataatsimiititaliaq isumaqarpoq, taamaattumillu pissutsit sukumiisumik misissorneqartariaqarput. Tamanna pissutigalugu utoqqalinermi soraarnerussutisialinnut immikkut kinguneqaataasinnaasut erseqqinnerusut nassuaammut aamma ilanngunneqarnissaat pingaaruteqarpoq.

4. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassat siunnersummumt nalinginnaasumik nassuaatini allaaserineqarput. Tamatumunnga ataatsimiititaliaq allanik oqaaseqaatissaqanngilaq.

5. Ataatsimiititaliap inassuteqaatai

Naalakkersuisut allannguutissatut siunnersuutaat akuerineqassasoq **ataatsimiititaliamamerlanerussuteqartut** Inuit Ataqatigiit, Siumup Demokratillu inassutigaat.

Naalakkersuisut allannguutissatut siunnersuutaat itigartinneqassasoq **ataatsimiititaliamikinnerussuteqartup** Naleqqameersup inassutigaa.

Ikinnerussuteqartoq siuliani taaneqartoq inassuteqaammut atatillugu ima ikinnerussuteqarluni oqaaseqaateqarumavoq:

“Nunatsinni utoqqartagut ukiorpassuit sulisimapput taamaattumik pitsaasumik utoqqallutik inuuneqarnissartik sulinermikkut aningaasarsiornikkut sulegataanermikkut kivitse-qataaffigisimavaat.

Inuiqaqtigiit nukittuut ertiutigaat sanngiinnerusortaminntaamattullu utoqqartaminnut ataaqqinnittumik periuseqarlutik atugassaqartitsillutillu ingerlatsisut.

Nunatsinni utoqpartatta aningaasaqarnermikkut ajorluinnartumik ukiorpassuarni inissisimanerat oqallisaasarnikooqaaq taamatullu ukiorpassuarni qineqqusarutaajuarsimallutik

aaqqiisoqartannginna pillugu Naleqqamiit sakkortuuliortaarutigisariaqarsimavarput utoqqartagut qineeqqusaarutaallutik salloqittaaruataaqqissanngitsut, tamannalu tunaartara-lugu aaqqiisoqarnissaanik noqqaassuteqarnikkut kiisami utoqqartatta aaqqiiffiginiarne-qartarerat alloriarfisusimapput, tamannalu aatsaat ilungersuutigeqqaarlugu aaqqiissute-qarfigineqartaqarsimaluni.

Una siunersuut aamma taamatorluinnaqqissaaq inissisimavoq kikkut tamarmik qineeqqusaarutiginikuuaat taamaammallu misissueqqigata politikkikkut aaqqitassaasoq Naleqqamiit isumaqaratta uani aaqqiinissaq siunnersuutaasoq timitalersornissaa uagut aaliungismallutigu ikinnerussuteqarluta oqaaseqaateqarpugut.

Inuunertik naallugu utoqqartagut kivitsinikuusut pivagut aamma taakkua ilagaat 1975 sioqqullugu sulisimasut akileraartoqartanngikkallarmalli pitsasumik asuli neriorsortaa-ginnarunnaarlugit aaqqiiffigineqarnissaat piffissangormat neriuuprugut allat neriorsuisi-masut neriorsuisimanertik atorlugu piviusunngortitsinissamik aqqutissueqqataassasut.”

Taama oqaaseqarluni isumaliutissiisummilu allassimasutut paasinnilluni ataatsimiitaliap siunnersuut aappassaaniigassanngortippaa.

Asii Chemnitz Narup
Siulittaasoq

Jens Frederik Nielsen
Siulittaasup tullia

Karl Tobiassen

Mariia Simonsen

Kuno Fencker

Peter Olsen

Jens Napaattooq